

ԼԻԱՆԱ ՆԱԶԱՐՅԱՆ

Կրտսեր գիտաշխատող,
ՀՀ ԳԱԱ պատմության ինստիտուտ
Lian_nazaryan@mail.ru

ԴԱՎԻԹ ԿՈՒՐԱՊԱՂԱՏԻ ՏՈՀՄԱԲԱՆՈՒԹՅՈՒՆԸ

Քանալի բառեր՝ Դավիթ Կուրապաղատ, Արրներսեհ I, Տայք, տոհմածառ, Դավիթ Մեծի ծագումը, Վրաց Բագրատունիներ, Սմբատ պապմիչ:

X դ. երկրորդ կեսին Տայքի կուրապաղատության պատմության մեջ բացվեց նոր էջ, որը կապված էր Դավիթ Կուրապաղատի անվան հետ: Նրա օրոք Տայքի կուրապաղատությունը դարձավ հզոր իշխանություն, որի կշիռն ու ազդեցությունը մեծ էր թե՛ Հայաստանում և թե՛ հարևան երկրներում: Պատմագիտության մեջ նա հայտնի է «մեծ», «թագավոր» տիտղոսներով¹: Ասողիկը Դավիթ Կուրապաղատի մասին գրում է. «զի էր այրն [Դավիթ – Լ.Ն.] հեզ և հանդարտ, առաել քան զամենայն թագաւորս, որ ի ժամանակս յայս» և ավելացնում. «Եւ եղև նա պատճառ խաղաղութեան և շինութեան ամենայն արևելայց, մանաւանդ Հայոց եւ Վրաց»²: Իսկ Արիստակես Լաստիվերտցին նրան բնութագրում է իբրև «այր հզօր և աշխարհաշէն, մեծապարզ և աղքատասէր, որ էր արդարև սահման խաղաղութեան»³: «Վրաց Տարեգիրք»-ը Դավթի մասին նշում է, որ նա հոգատար էր աղքատների հանդեպ, խաղաղասեր էր,

¹ Տե՛ս **Ադոնց Ն.**, Դավիթ Կյուրապաղատ, «ՊԲՀ», 2002, թիվ 3 (այսուհետ՝ **Ադոնց Ն.**, Դավիթ Կյուրապաղատ), էջ 14, հմտ. **Միքայել վարդապետ Չամչեանց**, Պատմութիւն Հայոց, ի սկզբանէ աշխարհի մինչև ցամ տեառն 1784, հ. Բ, Վենետիկ, 1785, էջ 837, **Avalichvili Z.**, La succession du Curopalate David d'Iberie, dynaste de Tao, „Byzantion”, 1933, 8, էջ 177, **տոფչուրաձ Զ.**, აღმოსავლეთ აზიერკავკასიის პოლიტიკური ერთეულები XI–XII საუკუნეებში, თბილისი, 1975, էջ 186, **Лордкипанидзе М.** Из истории грузино-византийских взаимоотношений на грани X–XI вв., საქართველოს ფეოდალური ხანის ისტორიის საკითხები, II, თბილისი, 1972, էջ 33:

² **Ստեփանոսի Տարօնեցոյ Ասողկան** Պատմութիւն տիեզերական, Ս. Պետերբուրգ, 1885 (այսուհետ՝ **Ասողիկ**), էջ 275:

³ Պատմութիւն Արիստակիսի Լաստիվերտցոյ, աշխատասիրութեամբ՝ Կ. Յուզբաշյանի, Ե., 1963 (այսուհետ՝ **Արիստակես Լաստիվերտցի**), էջ 22:

Դավիթ Կուրապաղատի տոհմաբանությունը

համեստ, բարի ու մարդասեր, եկեղեցիներ կառուցող, նրա հիմնած եկեղեցիներից էր Խախուի նշանավոր եկեղեցին⁴:

Դավիթ Կուրապաղատի մասին հայկական ու վրացական աղբյուրներում պահպանվել են բազմաթիվ տեղեկություններ, որոնք վերաբերում են ինչպես նրա կառավարման ժամանակաշրջանին, ներքին ու արտաքին քաղաքականությանը, իշխանության «կտակմանը» Բյուզանդիային և մահվան հանգամանքներին, այնպես էլ նրա ծագմանը:

Հայկական աղբյուրները սահմանափակվում են Դավթին «կիւրապաղատն Հայոց Դաւիթ»⁵ կամ «Վրաց իշխան» և «Վրաց կուրապաղատ»⁶ կոչելով: Իսկ վրացական աղբյուրները հիմնականում հիշատակում են նրան իբրև Տայքի կուրապաղատ Դավիթ⁷: Վերջինիս նախնիների ճյուղագրությունը պահպանվել է վրացական աղբյուրներում, սակայն դրանցում առկա են հատկապես Դավթի հոր՝ Ատրներսեհի հետ կապված հակասություններ: Վերջինիս ծագումը հստակ չէ, և նրան նույնացնում են այդ անունը կրող այլ տոհմակցի հետ: Հ. Պզտիկյանը նույնիսկ փոքր-ինչ չափազանցրած նշում է, որ Դավիթ Կուրապաղատի անձի, ծագման ու ազգության ուսումնասիրությունը «քաղաքականէն աւելի մշակութային է. անով միայն կրնանք Տայքի հրաշալի յուշարձաններուն հայկականութիւնը փրկել վրացական ձեռնմխութիւններէն»⁸: Ուստի անհրաժեշտ է պարզել Դավիթ Կուրապաղատի տոհմական ծագումը:

Բագրատունիների վրացական ճյուղը ծագել է VIII դ. վերջերին հայ Բագրատունիներից: Նրանք թեև ընդունեցին քաղկեդոնական դավանանքը, այնուամենայնիվ պահպանվում է նաև հայերենը և հայկական ծագումը: Դրա

⁴ Տե՛ս **Կարտլիս Ըხოვრება** (История Грузии), главный редактор Р. Метревели, Тб., 2008 (այսուհետ՝ **Կարտլիս Ըხოვრება**, 2008), էջ 147:

⁵ **Ասողիկ**, էջ 266:

⁶ Տե՛ս **Մատթէոս Ուռհայեցի**, Ժամանակագրութիւն, Բ. տպագրութիւն, Վաղարշապատ, 1898 (այսուհետ՝ **Մատթէոս Ուռհայեցի**), էջ 56, **Արիստակես Լաստիվերոցի**, էջ 33:

⁷ Տե՛ս **Կարտլիս Ըხოვრება**, 2008, էջ 146–149, **სუმბატ დავითის ძის ქრონიკა ტაო-კლარჯეთის ბაგრატიონთა შესახებ, გამოცემა მესამე, ტექსტი გამოსცა ვრცელი შესავლით, შენიშვნებით და ორი გენეალოგიური ტაბულით საქართველოს სსრ მეცნიერებათა აკადემიის წამდვილმა წევრმა ე. თაყაიშვილმა, თბილისი, 1949** (այսუიხետ՝ **სუმბატ დავითის ძის ქრონიკა**), էջ 67–68, **Вахушти Багратиони** История царства грузинского, перевел, снабдил предисловием, словарями и указателем Н.Т. Накашидзе, Тб., 1976 (այսուიხետ՝ **Вахушти Багратиони**), էջ 189:

⁸ **Պզտիկյան Հ.**, Տայք Բարձր Հայք, վրացական, թե՛ հայկական, Ե., 2005, էջ 76:

վկայությունն է հենց Դավիթ Կյուրապաղատի պատվերով արաբերենից հայերեն թարգմանված «Զրուցները»⁹:

Բագրատունիների վրացական ճյուղի առաջին թագավոր Ատրներսես I-ը (899–923), որը բյուզանդական աղբյուրներում նաև կոչվում է կուրապաղատ¹⁰, ուներ չորս որդի՝ Դավիթը, Աշոտը, Բագրատը և Սմբատը¹¹: Որդիներից Դավիթը մահացավ 937 թ.՝ անժառանգ: Ապա 945 թ. մահացավ Բագրատ մագիստրոսը, որն ուներ մեկ որդի՝ Ատրներսեսը (մահացած՝ 961 թ.) և սա, ըստ Սմբատ պատմիչի, հոր մահից հետո դարձել էր մագիստրոս, իսկ հորեղբայրներից հետո՝ կուրապաղատ¹²: Եղբայրներից Աշոտը մահացավ 954 թ.՝ անժառանգ, իսկ կուրապաղատի տիտղոսն անցավ մյուս եղբորը՝ Սմբատին, որն էլ մահացավ 958 թ.՝ ունենալով երկու որդի՝ Բագրատ Ռեզվինին, որին դարձրեցին վրաց թագավոր՝ Բագրատ II (958–994) և մյուսը՝ Ատրներսես կուրապաղատն էր (մահացած՝ 983 թ.)¹³: Այսինքն՝ չորս եղբայրներից երկուսը՝ Դավիթն ու Աշոտը, մահացան անժառանգ, իսկ մյուս երկուսն էլ՝ Բագրատն ու Սմբատը, ունեցան Ատրներսես անունով որդիներ: Այս երկուսն էլ, ըստ XI դ. վրաց հեղինակ Դավթի որդի Սմբատի, կրում էին կուրապաղատի տիտղոսներ, իսկ Սմբատի մյուս որդին Բագրատ Ռեզվինին էր:

Համաձայն Սմբատ պատմիչի՝ 961 թ. մահացած Ատրներսեսը՝ Բագրատ մագիստրոսի որդին, ուներ երկու որդի՝ Բագրատ էրիսթավների էրիսթավը և Դավիթ էրիսթավների էրիսթավը¹⁴: Ըստ նույն աղբյուրի՝ վերջիններս իրենց հորը ստիպել են դառնալ հոգևորական և մտնել վանք: Նրանցից Բագրատը

⁹ Ալիսենա Ն., Զրոյց Պղնձե Քաղաքի, «Հանդէս ամսօրեայ», Վիեննա, 1958, թից 1–4, էջ 30–48:

¹⁰ Կոստանդին Ծիրանածին, Օտար աղբյուրները Հայաստանի և հայերի մասին, 6, Բյուզանդական աղբյուրներ, Բ, թարգմանություն բնագրից, առաջաբան և ծանոթագրություններ Հ. Բարթիկյանի, Ե., 1970 (այսուհետ՝ Կոստանդին Ծիրանածին), էջ 15–17, 151, Թեոփանեսի Շարունակող, Օտար աղբյուրները Հայաստանի և հայերի մասին, 15, Բյուզանդական աղբյուրներ, Ե, թարգմանություն բնագրից, առաջաբան և ծանոթագրություններ Հ. Բարթիկյանի, Ե., 1990, էջ 237:

¹¹ Տե՛ս სუმბატ დავითის ძის ქრონიკა, էջ 66, Сумбат Давитис-дзе История и повествование о Багратионах, перевод, введение и примечания М.Д. Лордкипанидзе [Памятники грузинской исторической литературы, III, Тб., 1979 (այսուհետ՝ Сумбат Давитис-дзе), էջ 34–35, Вахушти Багратиони, էջ 189]:

¹² Տե՛ս სუმბატ დავითის ძის ქრონიკა, էջ 66, Сумбат Давитис-дзе, էջ 35–36:

¹³ Տե՛ս სუმბატ დავითის ძის ქრონიკა, էջ 67, Сумбат Давитис-дзе, էջ 36:

¹⁴ Տե՛ս նույն տեղում:

Դավիթ Կուրապաղատի տոհմաբանությունը

մահացել է 966 թ., իսկ «Դավիթը դարձել է մեծ», որի մահվան թվականը պատմիչը չի հայտնում¹⁵:

Սմբատ պատմիչի նշած մյուս Ատրնեսեսի՝ մահացած 983 թ., Սմբատի որդին և Բագրատ Ռեզվինիի եղբայրը, ուներ մեկ որդի՝ Դավիթը, որը երիտասարդ էր¹⁶: Սրա մահվան թվականը նույնպես նշված չէ: Այսինքն՝ ըստ Դավթի որդի Սմբատ պատմիչի, Ատրնեսեսի I թագավորի երկու որդիներն էլ ունեին Ատրնեսեսի կուրապաղատ անունով որդիներ, իսկ սրանք երկուսն էլ ունեին Դավիթ անունով ժառանգներ, որոնց մահվան թվականները հայտնի չեն: Սակայն պատմիչը քիչ անց նաև նշում է, որ «մահացավ Դավիթ մեծ կուրապաղատը, Ատրնեսեսի կուրապաղատի որդին, քրոնիկոնի 221 թ. (1001 թ.), և նա չունեց որդի»¹⁷: Խոսքը վերաբերում է Տայքի տիրակալ Դավիթ Մեծ Կուրապաղատին, սակայն չի հասկացվում, թե նրա հայր Ատրնեսեսի կուրապաղատը ո՞րն է՝ 961 թ., թե՛ 983 թ. մահացածը: Մինչ այս հարցի պարզաբանումը, անդրադառնանք նաև Ատրնեսեսի I թագավորի սերնդի մասին վրաց մեկ այլ հեղինակ Վախուշտի (XVII դ.) տեղեկություններին, քանի որ դրանցում ևս պահպանվել է նրանց ճյուղագրությունը, որը մասամբ տարբերվում է Սմբատի վկայություններից:

Վախուշտը ևս վկայում է, որ Ատրնեսեսի I թագավորը, որի մահվան թվականը չի նշում, ուներ չորս որդի՝ Դավիթը (մահացած՝ 937 թ.), Աշոտը (մահացած՝ 954 թ.), որոնք անժառանգ էին: Նրա երրորդ որդին էր Բագրատը, որին ըստ պատմիչի, բյուզանդական կայսր Ռոմանոս I Լեկապենոսը (919–944), շնորհել էր մագիստրոսի և կուրապաղատի տիտղոսներ¹⁸: Վախուշտն ապա նշում է, որ «այս Բագրատին որդիները ստիպեցին դառնալ հոգևորական և նա մահացավ 945 թ.»¹⁹ [ընդգծումը մերն է – Լ.Ն.]: Սակայն հաջորդ նախադասությամբ պատմիչը նշում է, որ Բագրատն ուներ միայն Ատրնեսեսի անունով որդի, որին կայսրը շնորհել էր մագիստրոսի կոչում, և սա մահացել էր 971 թ. (պետք է լինի՝ 961 թ., քանի որ նշված է քրոնիկոնի 181 թ., որը համապատասխանում է 961 թ.)՝ թողնելով երկու որդիներ՝ Բագրատին և Դավիթին՝ էրիսթավների էրիսթավ²⁰: Ըստ Վախուշտի, այս Բագրատը

¹⁵ Նույն տեղում:

¹⁶ Տե՛ս նույն տեղում:

¹⁷ სუმბატ დავითის ძის ქრონიკა, გვ. 68, **Сумбат Давитис-дзе**, с. 37.

¹⁸ Տե՛ս **Вахушти Багратиони**, էջ 189:

¹⁹ Նույն տեղում:

²⁰ Տե՛ս նույն տեղում:

մահացել էր 979 թ. (պետք է լինի՝ 969 թ., քրոնիկոնի 189 թ.), իսկ եղբայրը՝ Դավիթը՝ 976 թ. (պետք է լինի՝ 966 թ., քրոնիկոնի 186 թ.), որոնք ժառանգներ չունեին²¹: Վախուշտի նշած Բագրատը, որին որդիները ստիպել են դառնալ հոգևորական, իրականում ուներ միայն Ատրներսեհի անունով մեկ որդի, իսկ հոգևորական դառնալու վկայությունը շփոթված է Սմբատ պատմիչի նշած այդ նույն Բագրատի որդի Ատրներսեհի՝ իր որդիներ Բագրատի ու Դավիթի կողմից ստիպողաբար հոգևորական դառնալու հետ:

Համաձայն Վախուշտի՝ Ատրներսեհ I թագավորի չորրորդ որդին՝ Սմբատը, որի մահվան թվականն էլ չի նշվում, մահացել էր՝ թողնելով երկու որդի՝ Բագրատ Ռեզվինիին և Ատրներսեհին: Վերջինս, ըստ Վախուշտի, մահացել էր 983 թ., և ուներ Դավիթ անունով մեկ որդի, որը «տիրեց Տայքին, Բասենին, Թորթումին, Սոմխիթին, Կղարքքի հողերին, և Շավշթում և Ջավախքում տիրեց ամրոցների»²²: Ըստ պատմիչի, այս Դավիթը մահացել է 1001 թ., և չունենալով որդի՝ որդեգրել է Բագրատ Ռեզվինիի թոռ Բագրատին²³: Այսինքն՝ Վախուշտի նշած այս Դավիթը նույն ինքը՝ Տայքի Կուրապաղատ Դավիթ Մեծն էր, որը փաստորեն, համաձայն հեղինակի, Ատրներսեհ I-ի որդիներից Սմբատի սերնդից էր՝ նրա թոռը:

Սակայն, արքայազն Վախուշտի սույն վկայությունները, համեմատելով Սմբատ պատմիչի տեղեկությունների հետ, կարելի է նկատել որոշ անհամապատասխանություններ: Թեև Սմբատ պատմիչը, ինչպես վերը նշվեց, վկայում է երկու Ատրներսեհի որդիներ Դավիթներից միայն մեկի մահվան թվականը՝ 1001-ը, սակայն հստակ չէ, թե խոսքը նրանցից որի մասին է: Այնուամենայնիվ, պատմիչի տեղեկությունների քննությունից կարելի է պարզել Դավիթ Մեծ Կուրապաղատի ծագումը, և փաստել, որ Վախուշտը շփոթել է նրան ու հորը:

Յ. Մարկվարտը, հիմնվելով Վախուշտի տեղեկությունների վրա, Տայքի Դավիթ Կուրապաղատի հայր է համարում 983 թ. մահացած Ատրներսեհին²⁴: Ն. Ադոնցն իրավացիորեն նշում է, որ «հարկ կա դրանում կասկածել»²⁵: Ինչպես վերը նշվեց, ըստ Սմբատ պատմիչի, 983 թ. վախճանված Ատրներսեհի մահվան պահին նրա որդի Դավիթը երիտասարդ էր: Տայքի Դավիթ Կուրապաղատը 976–979 թթ. բյուզանդական զորավար Վարդ Սկլերոսի ապստամ-

²¹ Տե՛ս նույն տեղում:

²² Նույն տեղում:

²³ Տե՛ս նույն տեղում, էջ 189–190:


²⁴ Տե՛ս **Մարկուարտ Յ.**, Վրական Բագրատունեաց ծագումը, գերմաներէնէ թարգմանեց Հ.Մ. Հապոզեան, Վիեննա, 1915, տոհմաճառը, էջ 148:

²⁵ **Ադոնց Ն.**, նշվ. աշխ., էջ 14:

Դավիթ Կուրապաղատի տոհմաբանությունը

բության ժամանակ կայսերական արքունիքում բավականին ազդեցիկ դիրք ու համբավ ունեւ: Ուստի դժվար թէ 983 թ. երիտասարդ Դավիթը նման ազդեցիկ անձ լինէր 970-ական թթ.: Բացի այդ, եթե նա իսկապես հոր մահվան պահին երիտասարդ էր, ապա 990-ական թ. կեսերին չէր կարող լինել «այր ծեր... և անցեալ զաւուրբք»²⁶ և 1000/1001 թ. վախճանվել «լցեալ աւուրբք, ծերացեալ ժամանակօք»²⁷: Ն. Ադոնցը նաև նկատել է, որ Սմբատ պատմիչը 961 թ. մահացած Ատրնեսիի որդուն է կոչում «Մեծ»²⁸, որից էլ կարելի է ենթադրել, որ Տայքի Կուրապաղատ Դավիթ Մեծը հենց այս Ատրնեսիի որդին էր: Վերջինիս և իր որդիների մասին հիշատակված է Օշկ վանքի վրացերեն մի արձանագրությունում, որտեղ նշված են Ատրնեսիի կուրապաղատը, Բագրատ էրիսթավների էրիսթավը և Դավիթ մագիստրոսը²⁹: Փաստորեն, դրանից կարելի է ենթադրել, որ Դավիթը նախ եղել է մագիստրոս, ապա հոր մահից հետո՝ 961 թ. ժառանգել է կուրապաղատի տիտղոսը³⁰, իսկ նրա եղբայր Բագրատը մահացել է 966 թ.՝ լինելով էրիսթավների էրիսթավ:

Այսպիսով, դատելով աղբյուրների տեղեկություններից, կարելի է հստակ նշել, որ Տայքի կուրապաղատ Դավիթ Մեծը Ատրնեսիի I-ի չորս որդիներից Բագրատի՝ 961 թ. մահացած որդի Ատրնեսիի որդին էր:



**Տոհմաձառի հեղինակ՝
Լ. Նազարյան**

²⁶ Ասողիկ, էջ 270:

²⁷ Նույն տեղում, էջ 275:

²⁸ Տե՛ս Ադոնց Ն., նշվ. աշխ., էջ 14:

²⁹ Տե՛ս Սարգիսեան Ն., Տեղագրութիւնք ի Փոքր եւ ի Մեծ Հայս, Վենետիկ, 1864, էջ 90:

³⁰ Տե՛ս Ադոնց Ն., նշվ. աշխ., էջ 14-15, հմմտ. Միքայել Զամչեանց, նշվ. աշխ., էջ 837:

THE GENEALOGY OF DAVID KUROPALATES

NAZARYAN L.

Summary

Key words: *David Kurapalates, Atrnerseh I, Taik, genealogy, the origin of David the Great, The Georgian Bagratides, historian Smbat.*

In the middle of the 10th century David the Great became the Kuropalates of the Palace. The Georgian sources ascribe different origins to him. According to some sources, he ascended from the dynasty of Bagrat, being one of the four sons of the first King of the Georgian branch of the Atrnerseh of Bagratides. David's father was an Atrnerseh Kuropalates who died in 961. After his father's death, David was awarded the title of the Kuropalates of the Palace, becoming the last Kuropalates in Tayk (Tao).

РОДОСЛОВНАЯ ДАВИДА КУРОПАЛАТА

НАЗАРЯН Л.

Резюме

Ключевые слова: *Давид Куропалат, Атрнерсех I, Тайк, генеалогия, происхождение Давида Великого, грузинские Багратиды, историк Смбат.*

В середине X в. куропалатом Тайка стал Давид Великий. В грузинских источниках ему приписывается разное происхождение. Согласно источникам, он был из рода Баграта, одного из четырех сыновей первого царя грузинской ветви Багратидов Атрнерсеха. Отцом Давида был Атрнерсех куропалат, который умер в 961 г. После смерти отца Давид получил титул куропалата, став последним куропалатом Тайка.